



## Julehelsing frå Rogaland bygdekvinnelag

Hei alle medlemmer i RBK

Denne gong kjem helsinga frå ei anna enn Astrid Hammersmark. Som de kanskje har fått med dykk, har ho gått av som leiar, for å ivareta si eiga helse, sidan ho slit med hjarta. Styret har konstituert seg på nytt, og Marianne Jøsang, tidl. nestleiar, har audmjukt teke på seg rolla som konstituert leiar.

Nestleiar-rolla er det ikkje nokon som har, men Astrid vil fortsetje å følgje med på mail og svara på relevante spørsmål. Elles har Solveig Marie Ådneram overteke ansvar for sone 1, og har rykka opp til fast styremedlem. Else Heskjestad er nå 1.vara. Oss styremedlemmer fungerer godt i lag, og saman skal me gjere vårt beste med å dra lasset framover.

Heile dette året har blitt spesielt på alle måtar, både i bygdekvinnelaget, og elles. Først var det total nedstenging, og sidan var det forsiktig oppopning. Aktivitetane i lokallaga blei ikkje slik ein hadde tenkt, men trass alt var det jammen mykje som føregjekk. Mange arrangerte gåturar der det er fritt for covid-19. Det har blitt trend å laga uteaktivitetar der det lar seg gjere. Og når samlingar vart tillete, har mange lag vorte kreative for å få til både "Bruk heile dyret", sying, pynting i kyrkja, tradisjonsmat, strikking, gåturar, årsmøter, KvinnerUT, BygdekvinneDelerMatGleder osb. Me i Rogaland bygdekvinnelag kan vere stolte over kvarandre som får til så mykje.

Slik som situasjonen i landet er pr. skrivande stund, er det med litt bismak at samlingar på tvers av kommunegrensar igjen må føregå digitalt. For det beste me i styret veit, er å kunna samlast fysisk. Men me ser, at sjølv om dei digitale samlingane ikkje vert det same, er det òg langt på veg ei god hjelp. Me kan snakka saman. Det er fort gjort å kalla saman om det er hastesaker. Det er kostnadsparande. Det er ein måte å vere saman på i desse tider.

Diskusjonar i styret ang. dette temaet har ført til at me nå kjem til å knyta oss opp mot både "Zoom", der me har god ekspertise frå Norges bygdekvinnelag me vil nytta oss av, og "Teams". Som de veit, har den kjekke sekretæren vår, Are Hauge Braaten, òg arbeid i Bondelaget, og han vil verte den "naturlege" inngongen til "Teams". Det skal bli moglegheiter for øvingar, og det vert ei spanande tid framover.

BygdekvinneDelerMatGleder er allereie nemnt. Dette er det store prosjektet i RBK med aktivitetar som skal gå over to år, i samarbeid med Gjensidige-stiftinga. Dei åtte del-prosjekta er godt i gong, om enn ikkje på den planlagte måten. Men med ein del utfordringar ifm. korona, utsetjingar, osb., håpar ein etter kvart på nye prosjektsamlinger, og at det vil verte mogleg å gjennomføre det meste av dette arbeidet. BDMG har fått godt ry over heile landet, og det er kome inn spørsmål av diverse slag for å få i stand liknande prosjekt.

Tidlegare i november fekk styret mail frå eit av lokallaga med oppfordring om å fronte FN's internasjonale dag for avskaffing av vold mot kvinner, som var den 25. november. Denne dagen blei det lagt ut ei forteljing, samt bilete av kaffien som me kan kjøpa på Rema1000, på facebook. Kjøper ein denne kaffien, er ein med og støttar opp mot å redusere vold og å betre kåra til kvinnene i Guatemala. Dette er òg eit samarbeid mellom NBK og Utviklingsfondet. Alle kan til ei kvart tid framleis kjøpa denne kaffien.

Dette året nærmar seg slutten. Julehøgtida set snart inn, og førebuingar er i gang. Nokre lag har valgt å avlyse aktivitetar i desember, men mange vil òg utføra med atterhald om restriksjonar. Den nye leiaren i NBK, Jorun Henriksen, seier det er viktig at me planlegg. Dette for å halda aktivitetane i sig og kontakten åpen. Meir enn nokon gong er det viktig for alle at ein har noko å sjå fram til. Ver kreativ og oppfinnsam. Finn på noko saman med dei du har rundt deg. Gjer det til ei glede for andre, og ikkje minst deg sjølv, å ta i bruk telefonnummer du kanskje vanlegvis ikkje brukar.

Då vil skrivaren få lov å avslutta dette brevet med å seie tusen takk for det me har hatt ilag gjennom dette året. Mykje gildt. Mykje latter. Mange kjekke oppgåver og gjeremål. Ein del utfordringar og tankar mht. korona. Det er slik opplevinga av året har vore. Og det er slik me vil ha det, men utan korona.

Så ynskjer me at alle får ei rett koseleg adventstid, og at alle får unnagjort førebuingane sine på ein god måte. Og sist, men ikkje minst: Me ynskjer at alle får ei fredfull og god jul, saman med sine næraste.

Med beste julehelsing oss i styret;  
Marianne Jøsang, Inga Lill Håkull, Gro Mabel Anda, Astrid Lund Folkvord, Solveig Marie Ådneram og Else Heskjestad. Frå litt i bakgrunnen helsar Astrid Hammersmark òg.

